



BEDANKWAORD AODJEUGRINS TEUN D'N IEËRSTE

Op 8 november 2023 's aoves nao de keeperstraining in Helde mós ich mèt pap en mam 'n kesje ophaole wat mam zoeëgenaamd hei gekoch. Sjtinkend en zoeë vettig wie sjpek mós ich mei, want pap kós det neet allein drage...

Weej sjtaon veur de deur en Sharon maakt de deur aoep, mer ich hei niks in de gate en woog ouch neet mei nao binne, ich sjaamde mich kepot wie ich d'r oet zoog...

Nao vuuel gesanik van mam bön ich toch mer mei nao binne gegaon! En mergood ouch, want einmaal binne kreeg ich de groeëte vraog of ich Jeugprins 2024 woog waere...

Ich waas sjprakeloos... 'nen druum dae oetkwaam... Wauw, fantastisch ich waer gewuuen Jeugprins!!!

Daonao zag ich volmondig jao en höbbe weej d'r nag 'ne sjoënen aovend van gemaakt! En mien breurke Gies mer dinke wao blieve die toch...



Vanaaf toen is 't groeëte fieës begós, vuuel beejin gekómme òm alles te regele, besjtèlle en organisere en det allemaol sjtiem! Ohhh wat waas det mei sjpannend en wat höbbe weej 't toen al sjiek gehad! Gelökkig höbbe weej alle dreej aojers die ouch gans vastelaovesgek zien en alles mèt ós same höbbe bedäch en geregeld!

Mer wat mósde weej nag lang wachte veurdet 't zoeëwied waas. Ich sjtóng al vanaaf d'n 11e van d'n 11e in mich zelf te sjpringe wie 't geweldige trio van De Kook, Prins Stan d'n ieërste mèt zien adjudante Vincent en Tim, oet 't fernuus sjpróng! En 'n waek later 't geweldige boerebroeiefsgezelsjap van Sjiwa mèt broedegóm Bennie en broed Dirkje! Det waas ech sjiek! Ich huuer nag altied Sjiwa Prins, Sjiwa Prins...



12 Jannewari waas 't eindelijk zoeëwied det weej in zaal Sjiwa oet de deuk meugde sjpringe! Det waas gaaf, eindelijk waas de kop d'r aaf en ging 't loos! Wat 'n fieës, wat 'ne waanzinnigen tied ginge weej same in! Weej höbbe d'r alles oet gehaold, gedaon en van genaote, d'n tied waas eigelik vuuels te kort. Zoeëvuul herinneringe gemaakt die ze ós noeëts mieër aafnimme!

3 Fibberwari waas ein van de hoeëgtepunte, de resepsie! Ich woort thoes aafgehaold en wie... Wat 'n minsemassa waas d'r beej! 'n Resepsie, geweldig! Ich kèn nag sjtieëds neet geluive det idderein dae dao waas ouch veur ós as trio, sirremoniemeister en Raod van Elf is gekómme... Danke daoveur!

Nao drökke waeke en vuuel activiteite ginge weej langzaam nao de vastelaovend zelf, die daag vloghe veurbeej, en wat 'n

pleezer, man wat kèn Baolder vastelaovend viere!

Mèt 'ne lach en 'n traon, de supersjoeëne wäörd van Prins Stan d'n ieërste en van Danny names de JVB. Ich kèn heej euver mer ein dink zegge... Wat is 't 'n ieër òm gevraogd te waere as Jeugprins 2024, dankjewel!!!



Dankjewel aan mien adjudante Jop en Daan, sirremoniemeister Fleur en de ganse Raod van Elf, det weej 't jubileumjaor JVB 5x11 same höbbe meuge knalle, geej waert allemaol top!

Dankjewel pap, mam en Gies, mer ouch Graad, Evelyne en Gijs, Edward, Marijke, Gijs en Fleur, wat geej allemaol veur ós höbt gedaon, georganiseerd, geregeld en mei gefieëst höbt!

Dankjewel De Kook, Prins Stan 1 en Adjudante Vincent en Tim, wat hebbe weej d'r un fies van gemaakt, ech geweldig met uch! Sjiwa Prins, Sjiwa Prins... ich heb d'r gewuun 3 breurs beej gekrege!





Dankjewel Boerebroefsgeselsjap Sjiwa, broedspaar Bennie en Dirkje, t waas waan! Sjiwa Prins, Sjiwa Prins...ich höb d'r gewoeën 'n ganse familie beej gekrege!

Dankjewel kammeräöj det geej d'r waart en de vastelaovend same mèt ós höbt mei gevierd! Dankjewel familie en vriende det geej dit same mèt ós höbt gevierd en óngersjeund òm alles toet in de puntjes te laote verloupe. Zoe blie det Opa Mart dit nag haet mei meuge make!



Els Vestjens veur 't hersjtewelwèrk wat d'r waas as ich wer hielemaol los waas gegaon...

En as letste dankjewel JVB, Danny, Ronald, Paul, Luciënne, Nikki, Sharon, Judith, Dirkje en Saskia, det ich Jeugprins 2024 höb meuge zien... wat 'n ieër!

Dankjewel veur 't in de watte legge, superzörg en organisasie! Geej zit in mien hert en laot uch d'r noeëts mieër oet!!!!

Geej ziet TOPPERS !!!!!

En den sjloet ich veur de allerletste kieër aaf mèt mien motto...

AL 5x11 JVB ALAAF, MAAR MÈT ÓS VEUROP WUUERT 'T PAS ECH GAAF!

